

欽  
定  
全  
唐  
文

欽定全唐文卷二百二十七目錄

張說七

唐西臺舍人贈泗州刺史徐府君碑

齊黃門侍郎盧思道碑

唐故廣州都督甄公碑

元成府左果毅贈郎將葛公碑

潁川郡太夫人陳氏碑

贈涼州都督上柱國太原郡開國公郭君碑奉勅

撰

唐故豫州刺史魏君碑

撥川郡王碑奉勅撰

唐故高內侍碑

故洛陽尉贈朝散大夫馬府君碑

欽定全唐文卷二百二十七

張說七

唐西臺舍人贈泗州刺史徐府君碑

敘曰經天地揭日月文之義也掌邦籍出王命位之崇也  
本乎言行君子之樞機成乎易簡賢人之德業則徐公其  
人也昔公奮明哲之姿當高宗之盛天保大定俊乂用彰  
而光耀天臺雲飛綸閣文敏以暢機務稽古以析嫌疑禮  
樂政刑擇三代之令典典謨訓誥有唐虞之遺風較然於  
庶績者可得而聞也其嘉猷讜言沃心造膝滋液內潤精

微外密混成於元象者不可得而聞也公諱齊聃字將道  
姓徐氏東海郟人也遠祖偃王基仁義於上代嚴考孝德  
濟宏美於近世公始以宏文生通五經大義發跡曹王府  
參軍右千牛兵曹潞王府文學崇文館學士兼侍皇太子  
講又芳林門修書於時中朝碩老下國英雋皆忘年請交  
不遠來謁望其路者若晨風之赴北林得其門者如衆山  
之仰東岱公不樂趨競雅尚退謚深以椒房之家聲名太  
甚求爲外職出宰桃林未下車勅改沛王掾終歲選擬司  
績員外司議郎並不就乞補雲陽令到官累日詔除司城

員外郎乃遷西臺舍人其爲政也如始云爾初公幼而殊異八歲工文太宗聞其聰明召試詞賦錫以佩刀金鞘稱曰神童及中年高宗嘉其道優悉命皇子受業訐謨帝采許以國鈞故公備更潞沛豫諸王侍讀上之在周邸也公嘗來誨詩焉夫然集虎觀之書承龍樓之問二宗之代矯首辭林四王之門從容經席非有海山之藝溫良之德儀形以孚柔嘉維則其孰能發揮聖智啟迪天人者乎咸亨元年出爲蘄州司馬二年坐事徙於欽州夫君子大守道而小守位污隆隨時屈伸以義去令尹而不愠失司寇而

遂行蕙蘭敗不爲不芳日月蝕不爲不明姑務忠信何陋  
蠻越優游欽江歲餘而沒春秋四十有三惜乎不登宰衡  
以平天下天天是塚命也歟旣而慶隆嗣子返公孫之柩  
德施後王拜先師之爵上元三年某月歸葬於少陵原中  
興神龍元年贈泗州刺史褒賢追遠念道尊師聖人之禮  
也議者以公考果州府君高學才華香名省闈武帝賢妃  
姊也大帝婕妤妹也公旣高步掖垣子又踐修舊職同生  
標藻於鸞殿重世含章於鳳池自班姬父兄文雄漢室左  
思女弟詞蔚晉宮悠哉二族徐氏三矣才難不其然乎凡

是好文之君賞音之士公之逝也豈不慨然閱青簡而存  
凌雲之氣操朱絃而想流水之屬哉厥子曰堅景龍中加  
金章紫綬行禮部侍郎得以命卿之祿奉蠲潔之祀無念  
烈考樹之家風廼刊石立頌將以識往行攄無窮使本支  
百代不忘先人之不隕其名也其詞曰

王言惟令中禁是司帝嘉文父曰汝宜之終溫且惠習禮  
明詩長裾傳道大筆修辭鴻業潤色元黻緝熙昊天大戾  
君子明夷蒼梧啟手涅而不緇中興受命逝者無追靈符  
泗水崇贈先師髣像精魄丕承聖期教近子貴榮躋父慈



學嗣三葉才俱一時春秋孝享霜露深思後之視昔斯文在茲

齊黃門侍郎盧思道碑

有齊黃門侍郎范陽盧公諱思道字子行涿州人也其先姜姓世胙東海別爲盧氏家於北燕自漢世中郎將植至侍中陽烏徵君之子稟天靈傑承家令軌清明虛受磊落標奇言不詭隨行不苟合游必英俊門無塵雜至於求己勵學探道覩奧思若泉湧文若春華精微入虛無變化合飛動斯固非學徒竭才仰鑽之所逮也事齊歷散騎侍郎

以文翰直中書中廢復進至給事黃門侍郎待詔文林館  
武平末天子總兵禦寇太子監國於晉陽公留綜宮朝兼  
典樞密及皇輿敗績於外而百寮蕩析於內公節義獨存  
侍從趣鄴告至行賞授儀同三司入周除御正上士定省  
歸郡郡人祖英伯作難公脅在其旅幽都旣平玉石將燎  
賴元帥宇文公舉以舊有令聞引謁因命草露板立就駭  
其麗異其敏釋於齊斧之下捐於羣士之上除掌教上士  
隋高祖爲丞相也遷武陽太守以母老乞解職優詔許之  
後復徵爲散騎侍郎奏內史郎事隋開皇六年春秋五十

有二終於長安反韓故里凡更臣三代易官十七再降一  
免二去職八平除擢遷者四而已公處屯安貞賦詩積飲  
視得失蔑如也臨難無懼在黜無愠危不去主仕不違親  
休明有賓禮之盛顛覆無淪胥之禍其大雅者歟夫禮儀  
損益公能言之故與熊安生詳定齊禮三墳五典公能讀  
之故與薛道衡侍學儲后公國華人望光照鄰邦故所居  
之朝應對賓客修詞抗議允執其中故青瑣黃縑異代咸  
掌大名之下豈誣也哉昔仲尼之後世載文學魯有游夏  
楚有屈宋漢興有賈馬王揚後漢有班張崔蔡魏有曹王

徐陳應劉晉有潘陸張左孫郭宋齊有顏謝江鮑梁陳有  
任王何劉沈謝徐庾而北齊有溫邢盧薛皆應世翰林之  
秀者也吟咏性情紀述事業潤色王道發揮聖門天下之  
人謂之文伯於戲國有校家有塾祿位以勸風雅猶存然  
千數百年羣心相尚竟稱者若斯之鮮矣才難不其然乎  
然則飛黃虛騁百轡遺路鷦鷯天運萬翼無階文士擅名  
當時垂聲後代亦云乎才力之絕衆故爾開皇以來百三  
十餘載天贊唐德生此多士公之元孫曰藏用濟美文館  
重祿黃門永惟衣冠子孫邑里多改先人封樹歲久將平

廼假詞菲才刊石表隧庶乎涉齊地者不薪柳惠之隴過  
邢山者無惑子產之墓至矣乎盧氏之子其用心也遠矣

銘曰

戎或黃門實天生德才蓋一世榮聞四國文王旣沒文在  
人宏公爲宗匠當朝與能龍躍春霽鳳鳴朝昇或頌或變  
或雅或承理以神合聲以妙徵高視睢渙與君代興人之  
云亡十有一紀斯文未喪施於孫子新作豐碑德音不已

唐故廣州都督甄公碑

君諱亶字道一中山無極人也昔胡公紹舜奄有大邦楚

子縣陳逃威樂土當烈王之王也有陳通奔周王以爲忠  
將美其族言舜居陶甄之職命爲甄氏錫姓因生如堅之  
讀形聲轉注以真爲音處則稱劉明歸晉者以異變而爲  
郭蓋承號者有馮通之裔邯仕漢爲太保次司馬承陽侯  
邯十六代而生鸞仕齊爲太山太守司隸校尉無極縣伯  
撰笑道論行於代鸞生隋汾州刺史族族生隋沁州刺史  
紹紹生隋新市令協協生單于大都護府錄事參軍贈宋  
州刺史封惟祖惟曾在商在夏世濟其美永觀厥成君即  
宋州府君之第四子也博綜經史脫畧流俗情之所遺對

咫尺於千里氣之所重輕百金於一諾曰興曰比階應劉之閭奧或草或真藏鍾張之筋骨譽滿鄉曲聲聞闕庭天后臨朝再加辟命皆辭以親老不赴逮疾革易簀骨立廬墓復有制徵焉刺史獨孤莊率府僚敦喻起於墳左乃授左金吾中候生盡其養豈違親許人沒盡其哀方委身徇國或用或舍有以見大君之仁時止時行有以觀大孝之節君臣之際其遠矣哉尋除左千牛長史檢校武始軍長史攝右臺侍御史兼靈武道行軍長史攝右屯衛郎將副臨洮軍使轉右驍衛右郎將爲臨洮大使拜蘭州刺史兼

榆林臨洮等軍大使除夏州都督兼鹽州防禦使徵授幽州都督衣之以紫攝御史中丞爲河北軍州節度大使君政成周月惠則在人患是緩風表以去職未幾復除夏州都督屬山戎矯虔俶擾王畧兵落天上思回行以出奇虜墮計中守便宜而未進時以爲逗遛貶撫州刺史朝廷明此舉也未到官遷廣州都督兼嶺南按察五府經畧討擊使春秋五十有七開元五年七月二十八日終於官舍以某年月日歸葬於恒陽之王公山南原不忘本也君三承辟命再攝憲曹八典戎旅五司藩翰事之去就所歸必執



其中職之高卑爲政各當其選觀夫果於事喻於義下學而上達強立而知類畏克厥愛道無常師有商也之文有求也之藝習禮必本飾之以菁華積行必崇茂之以枝葉以此探賾則投刃皆虛矣以此効官則操刀必割矣是故羣士之所鞅掌而君之所綽約常情之所戚戚而君之所蕩蕩由是言之搶榆之與海運鳴琴之與星入從可知也惜其志懷慷慨雅多大畧援桴作氣有七縱之能孤劍無前當萬人之敵竟不得橫絕漠騁雄算刮狼望之稜鏡乎太清卷瀚海之波靜而可掃駸駸之足受羈騏驥之途堂

堂之貌不畫麒麟之閣彼哉彼哉有遺恨矣其孤某等望  
兮不至求兮不得永懷揚名庶慰罔極銘曰

有鰥在下陶復河濱元女作合相攸於陳楚爲不道祚以  
永淪周寵忠節氏以初因丕惟承陽致君論道施及無極  
建家載考彼汾彼沁伊時之寶宰兮牧兮亦孔之好積慶  
潛演俊乂挺生標格磊落氣志清明八司戎事厥謀有成  
五刺方伯厥政有聲山有杞梓工思其度國有孫吳君思  
其畧棄德珠浦遺氛沙漠惜哉不當今也可作恒岳臨北  
滹沱注東仁不忘本孝亦令終壽堂盤薄牧子充窮勒美

松隧穆如清風

元城府左果毅贈郎將葛公碑

公諱威德字某曰葛氏京兆涇陽人也其先嬴姓咎繇之後夏有葛伯氏族興焉寧陵之傍尚傳侯國綏山之下獨有仙祠嬰則威伏五城龔則績稱二縣鴻臚秀於吳會散騎崇於晉景在其子孫是宜繁羨公生而開朗長而英拔非因馬鄭之學動合禮經不待孫吳之書暗同兵法有拳勇尚氣概顧眄稜華風神都爽五馭善於東野六射勁於西霜少以嫖姚之才入光供奉之選御橋驂駕犯清蹕而

不驚輦道啼鳥應鳴弓而自落便蕃左右星歲重深賜上  
柱國拜元城府左果毅天下大定李廣之用無施雲中薦  
賢馮唐之言已老春秋六十五神功二年某月終於洛師  
藁殯邨阜夫人太原郡王氏夫人郭氏實生大將軍福順  
一見聖主再紐乾綱重位冠乎北軍茂功藏乎南史故象  
服臨祭魚軒以朝天子深嘉歎馮勤之母羣公列拜賀虞  
潭之親享年七十五薨於京兆之三真里公愛敬奉親軌  
則可移於後代義方訓子福祿來及於先人葬有日矣乃  
下制曰禮著飾終情惟悼往詢諸前列抑有舊章前左羽

林軍大將軍葛福順亡父某守其謙素宏此藝能未展才  
術奄從凋殞而嗣子克家式昭勲業旣念功以追遠亦自  
葉而流根宜申獎贈俾慰泉壤可贈遊擊將軍守右驍衛  
翊府郎將開元九年二月九日韓我郎將君前夫人王氏  
後夫人郭氏祔焉禮也章芾以襁輅旗在列廟食備其牲  
牢法韓陳其簫鼓孝慈之道著矣哀榮之禮畢矣尋彼平  
生之事忽如絕光繫乎碑版之文永存遺烈銘曰

硜硜都尉角立傑豎神銳玉劍氣雄金鼓六藝爰設射馭  
爲武百行雖名忠信爲主時不兼命位不充才善流慶荅

身謝榮來太原棣棣實惟嘉偶羽林桓桓克大其後

潁川郡太夫人陳氏碑

潁川郡太夫人者諱某字某雷州大首領陳元之女羅州大首領楊歷之妻驃騎大將軍兼左驍騎大將軍號國公思勗之母也陳氏家富兵甲代奠嶠外夫人誕靈豪右淑問幽閑六行天至不因師氏之學四德生知無待公宮之教原夫陳本媯水楊承赤泉九真爲郡良史出乎中國五馬浮江僑人占乎南海兩州接畛二門齊望卜妻鳴鳳擇對乘龍楊公有聘玉之祥應姬獲探金之慶號公弱冠昇

仕鞠躬禁闥正性本乎胎教剛腸形乎義色神龍三年六月五日北軍作難西華失守騎入宮壺兵纏御樓公孤劍凌鋒羣兇奪氣倉卒之際安危是屬旣立殊常之勲遂蒙超次之命授銀青光祿大夫上柱國宏農郡公行內常侍其後改拜將軍太夫人是加爵邑高堂九仞重祿萬鍾朝廷美其揚名州黨尊其遠聽夫人富而好儉貴而能勤身却錦繡手親紡績公每昏定晨省夫人必誡之忠孝勸學文武嘗謂汝口稱思勗當心念其義父母名之欲汝三思而勗勵也故號公便習干戈漁獵書史致命伐罪擒叛獠

於百越寫誠誓衆破狂蠻於五溪鬪子弟如使手足請風  
雷若應期契聖朝荅高秩於驃騎酬大封於號畧豈非以  
辭第之懇忠成斷織之明訓臣節立矣君恩厚矣子孝成  
矣母慈著矣備此四者善孰加焉抑神道祐心而人倫興  
行詩曰母氏聖善又曰宜爾子孫斯實潁川太君之有也  
享年若干開元九年四月八日薨於長安之翊善里先公  
早世邱墳故域古無合葬禮有從宜夫以體歸下地萬里  
豈殊乎黃壤魂何不之雙棺幸同於元室以其年十一月  
十六日招魂祔葬於萬年縣龍首鄉神鹿里申孝子不忍



隔親之情也恩勅賜錢十萬絹布皆百段日碑忠厚漢武  
知其母教馮勤寵貴世祖稱其母德克軫天情頗爲連類  
號公生盡其禮沒盡其哀嗟閔水之日逝懼藏山之夜徙  
追鏤碑板遠貽圖傳蒸蒸至意有足感人恹恹信言固無  
媿色銘曰

陳公舜後楊侯周裔去國何人南遷幾世鄰淙嶂表珠崖  
海際兩族相京財雄兵銳猗歟邦媛儷茲國士友若琴瑟  
花如桃李心契法度容和愠喜資敬從夫移忠訓子嘉此  
令子南溟北歸於天鶴唳拔湔鴻飛朱宮退敵銅柱來威

國安家寵魚軒翟衣子封號國五公前字母邑潁川三君  
舊土感激榮慶踟躇今古高堂夜空弔客朝聚龍首山前  
前臨灞川招魂五嶺合葬三泉山山邱墓樹樹風烟孝碑  
不滅慈墳永傳

贈涼州都督上柱國太原郡開國公郭君碑奉勅  
撰

四序平分清秋之氣勁五方異俗崆峒之人武故隴上多  
豪山西出將其有雲龍感召星象特生金鼓登壇隱如敵  
國麾幢指塞自比長城得之於太原公矣公諱知運字逢

時其先太原著姓今則晉昌人也本乎文王之弟是爲虢叔虢或云郭因而氏焉自燕昭尊隗以築宮漢祖封亭以列國其侯於陽曲宅彼太原舊矣亭之元孫友從太原徙隴西昭帝分隴西置西平郭氏又爲郡之右族友之昆孫武威太守憲憲之猶子散騎常侍芝俱有名跡見於魏晉則晉昌諸宗散騎之後也爾乃一門連譽時人號曰三儒四海齊名天下謂之八顧光祿派分於馮翊廷尉世茂於潁川孝則天錫釜金忠則帝章冕服仁則猛獸不害信則童兒不欺豈直介休見有道之碑洛陽聞立德之傳而已

曾祖欽瓜州大黃府統軍上柱國祖才朝議郎瓜州常樂  
縣令上柱國父師朝散大夫上柱國贈伊州刺史磧鹵之  
地戎馬生郊業戰鬪而宏勲仕州縣而爲達啟莫京之繇  
福不在於其身積無聲之善慶必流於後嗣公太白之精  
雷泉之靈膺家之禎爲國而生身長七尺力能扛鼎猿臂  
虎口虬鬚鶚麟射穿七札劍敵萬人子卿路逢遙識將軍  
之相唐舉一見足辨封侯之骨解褐以善戰授昭武校尉  
秦州三度府左果毅以敗敵北庭加游擊將軍沙州龍勒  
府折衝兼右金吾郎將瀚海軍副使尋改朝散大夫伊州

長史伊吾副使以軍累破虜即授其州刺史進當軍經畧使朝廷以未愜前除且有後命遷本衛中郎將仍舊爲州軍使默啜之寇北庭也公奔命解圍軍聲大振加雲麾將軍右武衛將軍封介休縣開國公食邑二千戶開元二年吐蕃入隴右掠坳牧公兵以奇勝寇不復蹤積甲山齊而有餘收馬谷量而未盡歸功廟算朝議多之拜右羽林將軍持節隴右諸州節度大使兼鄯州都督河源軍使鎮西陲信國之藩屏坐北落亦王之爪牙故入奉期門而出分間寄於是料敵無備閒其師老潛軍一舉大俘九曲鎖甲

文劍棘馬犂牛旣獻戎捷遂頒朝賜乃兼鴻臚卿攝御史  
中丞改封太原郡開國公加前食邑三千戶執憲總軍典  
屬乘障增爵益邑遇厚恩深俄而六州羣胡相率大叛命  
公統隴右之騎濟河曲之師鋒鏑爭先玉石俱碎拜左武  
衛大將軍授一子官賜金銀器百事雜綵千段班師臨洮  
邁茲虐疾嗟乎匈奴未滅宿志不申生也有涯死而猶視  
開元九年十月二十二日薨於軍舍春秋五十有五蕃夷  
邊鎮血面椎心悲慘風雲號動山谷豈非良將視人如子  
人亦視猶父乎皇帝閔焉詔贈涼州都督米粟五百石錦

帛五百段命都水使者張景佚備物護葬遵朝典也惟公  
氣猛而性和量寬而精銳沈謀可以掩著蔡雄斷可以奪  
鬼神故常糟粕韜鈴芻狗風角然其樹恩結信立威用武  
烜赫如風濤盪震如雷雨戰必克攻必取每有奏謁上特  
稱歎孝文之得魏尚虜不足憂太祖之見郭嘉知成吾事  
前後錫錦衣寶帶文馬素女爛其盈門長鳴在廢感知己  
之主陳必死之力皇情西顧則九羌釁鼓詔書北伐則六  
夷焚旗上成聖君之元鑒下効武臣之素節其竟也如此  
夫爲人子立廟致敬祖考來格不亦孝乎爲人臣恢疆禦

侮以勞定國不亦忠乎若然者歸義方於先人揚令名於後代可也嗣子英傑起復定遠將軍左領軍衛翊府中郎將假紫服金章河西節度副大使英奇朝散大夫前尚輦奉御英協游擊將軍前京兆勵行府右果毅都尉英彥朝議郎前左衛胄曹參軍等咸善居喪而過哀或從王事而奪禮則知辛賢父子繼位將軍祭彤兄弟並參師律去本不戀達也而新是謀權也嘉此武功創其宅兆以十年七月葬我公太原夫人燉煌索氏祔焉禮也皇上念功以惜逝厚終以遇存有詔詞人爲其碑志介士送葬即封征虜



之墳單于入朝當祭度遼之墓銘曰

洸洸將軍雄畧冠羣平西征北震戎懾獯亭障臥鼓屯田  
饋軍仗此白刃致彼青雲郭侯宴喜旣多受祉元牡黻衣  
清廟蠲祀鼎食金奏炮鼈膾鯉旣來不庭有嚴天子流沙  
博望羽林飛騎河曲回兵臨洮舊防手握金節魂沈玉帳  
千里送喪三軍悽愴詔葬禮崇恩碑義豐生爲神將死爲  
鬼雄身世一滅榮華萬空祁連之墓長旌武功

唐故豫州刺史魏君碑

公諱叔瑜字思瑾曰魏氏鉅鹿曲陽人也考太師鄭文貞

公致君皇極配神清廟故祖德胄系敘於太宗之先碑矣  
公生育慶緒天然炳胎教之姿少長德門日用成躬率之  
化性盤於孝友習狃於禮樂俛仰中則從容蹈道加以專  
精好古旁通多藝聖人之所志聞一而反三君子之所能  
舉十而知九與同生璘琬知名當代始以門資補左千牛  
轉洛州司兵司議郎職方郎中太子洗馬出爲懷州長史  
歷慶慈儀豫四州刺史春華韡於兩宮時雨零於四郡觀  
風之使所在聲聞變雅之老到今遺詠其年春秋五十有  
一終於豫州葬於舊域夫人太原王氏祔焉禮也議者以

公不避強禦有昭子之政事不爲皎厲有康子之隱德虛  
已尚賢有文侯之樂善重諾分急有信陵之高義人鮮有  
一況兼四乎公賦入封君妹歸帝子車馬無戚里之盛衣  
服有儒者之節儉而得禮富而無驕此蓋奉先之素履也  
公善於草隸妙絕時人以筆意傳次子華及甥河東薛稷  
世稱前有虞褚後有薛魏此又貽訓之餘美也嗟夫公學  
埒向歆操齊固變若天假三壽朝登六事則鄭之桓武可  
尋漢之韋平一揆而年近知命位止方州落鵬翼於半霄  
負天之力莫展頓龍媒於局路追風之勢斯畢九原不作

誰將與歸二子獻華追完先德俾余作頌以慰罔極銘曰  
昂昂豫州毓粹含道欽若古訓思文烈考於穆烈考維國  
之師公承丕構思皇纘之發軔臺閣風流榮問建麾千里  
澤霽四郡位未充德命不遂才彼蒼孤善謂之何哉子孫  
必復邱封永久穆如清風振芳厥後

撥川郡王碑奉勅撰

珠玉無遠而登輦輅之飾寶也松栝無幽而入殿堂之構  
才也物貴其用人亦如之撥川王論弓仁者源出於疋未  
城吐蕃贊普之王族也曾祖贊祖尊父陵代相蕃國號爲

東贊戎言謂宰曰論因而氏焉公有由余之深識日碑之  
先見陋偏荒之韋毳慕上國之衣冠聖歷二年以所統吐  
渾七千帳歸於我是歲吐蕃大下公勒兵境上縱謀招之  
其吐渾以論家世恩又曰仁人東矣從之者七千人朝嘉  
大勲授左玉鈐衛將軍封酒泉郡開國公食邑二千戶周  
語曰犬戎樹敦守終純固今其俗獷而輕死其法折而不  
撓故前代無降人中土無僮僕自公拔身向化首變華風  
澤潞之間始見戎州矣若夫河南胡苑坰牧所利每歲冰  
合虜騎是虞中軍必謀於元老亞將固選於時傑神龍三

年以爲朔方軍前鋒游奕使景龍二年換右驍騎將軍開  
元五年兼歸德州都督使皆如故八年遷本衛大將軍改  
朔方節度副大使公之理兵也堅三革利五刃偶拳勇齊  
足力信賞罰分甘苦六轡如手千夫一心接獯獫猶蚊蚋  
臥沙塞如衽席薦居露食垂二十年雨畢而成師冰泮而  
休卒寒風入於肌骨夜霜出於鬚鬢人不堪其勤公不改  
其節韓公之建三城也公洗兵諾真之水刷馬草心之山  
以爲外斥而版徒安堵鄭卿之和默啜也公授館李陵之  
臺致饗光祿之塞以爲內候而賓至如歸九姓之亂單于

也公四月度磧過白檉林收火拔部帳納多眞種落彌川  
滿野懷惠忘亡漠南諸軍躡其計也降戶之叛河曲也公  
千騎奮擊萬虜奔走戮翦畧定師旅方旋而延陀蹙蹙復  
相嘯聚上軍敗於青剛嶺元師沒於赤柳澗公越自新堡  
奔命寇場羸糧之徒不滿五百兇醜四合衆寡萬倍公殺  
牛爲壘噉寇爲餉決命再宿衝潰重圍連兵躡踵千里轉  
戰合薛訥於河外反知運於寇手朔方諸軍壯其戰矣斫  
摩之奔也邀於黑山口覆其精銳布思之背也追至紅桃  
帳掩其輜重乳泊之會刺蘭池之狂胡木盤之役縲方渠

之逋寇凡前後大戰數十小戰數百算無遺策兵有全勝  
是以六狄逃遁三垂又寧聲暴露於天下業光華於代載  
信皇威之所加亦武臣之力也故錦衣寶玉允荅戎功甲  
第良田丕承錫命語其智効未甚優寵黃頭黑齒比價齊  
名積戰多瘡累勞生疹恩命尚藥馳往診之晉豎已深秦  
醫無及十一年四月五日薨於位享年六十制贈爲撥川  
王稱故國志其本也太常議諡曰忠由舊典昭其行也長  
子盧襲官封繼事業次子舊久特拜郎將十二年四月詔  
葬於京城之南懷遠人也太常鼓吹介士龍旆虎帳貔裘



封犛殉馬吉凶之儀舉夷夏之物備長安令總徒以護事  
鴻臚卿序賓以觀禮哀榮之道極矣君臣之義厚矣有命  
國史立碑表墓吾嘗同僚敢昧遺烈銘曰

黃河接天青海殊壤舉世安俗拔俗誰放倬哉論侯利有  
攸往奮飛橫絕搏空直上以衆款塞因敵立勲吐蕃萬戶  
吟嘯成羣精感天地氣合風雲旣封酒泉乃位將軍朔方  
陰塞直彼獯虜帝命先鋒闕如虓虎山北加竈漢南擊鼓  
十數年閒耀國威武我有師旅將軍鞠之我有邊氓將軍  
育之柳澗亡師一劍復之蘭池叛胡三戰覆之武節方壯

朝露不待王爵送終宿恩未改時來世去人物如在銘勲  
諡忠以告四海

唐故高內侍碑

孝足動天義堪變地河中見三州之姓炳彼精誠南亭聞  
再逢之母彰茲奇事不有隱德曠代誰鄰內侍高延福者  
將軍力士之慈父也粵自西雲干呂東明銜璧以亡王之  
族處巷伯之官而將軍本系馮亭代家南越未知父母來  
奉宮闈老而無子曰悲幼而失親曰苦調之悲者笙磬異  
器而同音貌之苦者秦胡別狀而共色從此斷金合要投

漆相受承順無違日嚴生乎本性仁慈匪飾天屬由乎自我父子之名既定姓氏之目因移大將軍之家去鄭而取衛平原侯之室變郭而從甄亦猶是也旣而內侍以鴻漸登朝蒨蒨朱紱將軍以龍樓得主艷耀金章其訓子也溫室之樹無言車中之馬數對其事親也三牲有養志之樂百行無匪疾之憂至矣哉高氏之子也以思親之願而展親以欲報之誠而報德神明翕而哀懇荒裔竦而慕義乃有旁求聖善提挈炎洲二紀積離萬里遙至音容莫識涕對茫然驗七星於子心認雙環於母臂而後深傷頓感若

墜谷而登天蘊怨都除類愈矇而覩日於是盡歡二媼兼  
敬三人均養之恩咸不寐於十起反哺之志齊色難於一  
堂羣公賀虞潭之親天子歎馮勤之母此復然矣內侍事  
主四朝厯官七政專良恭肅著美綸言冲謙儉讓得名朝  
列年六十有四開元十四年終於來庭里明年五月葬於  
長樂原繼子力士喪孺慕而加等葬罄誠而備物義方之  
經鬱爲稱首孝德之傳今見其人永惟先恩追綴餘烈若  
夫慈羈旅之稚童仁也約詩禮之尊教義也貴不居而要  
避權禮也生推心而死有託信也仁爲德本義爲行先禮

爲身宅信爲意田故仁之報也壽義之報也樂禮之報也  
安信之報也順履順居安乘樂享壽此四者生人之偉事  
自求之深致者矣於戲領賜冠馳寵勢偃蹇俗上煜爚君  
旁者豈不思景行高山慎視前轍如或少選亡禮顛沛違  
仁瞻言四報咫尺千里揚芳樹淑其不務乎予固春秋之  
徒也懲不濫而勸不僭義重天綱孝崇人紀樂諄諄之成  
訓善哀哀之克子不著倚相之書將受邱明之恥九原上  
千月深覽碑版傷知音有以見古史之心也銘曰

高堂樂未散重壤哀已擗寶帳吹靈衣金樽照塵席苦長

夜之易泯怨寸景之難惜刻義聲與孝心萬古千齡傳此石

故洛陽尉贈朝散大夫馬府君碑

君諱某字某扶風人也其先伯益贊禹中衍御殷在周曰  
羸在晉曰趙上卿以人歸政疑將軍以馬服爲姓緝熙乎

平通重合焜燿乎伏波中水我高祖汾州刺史諱歸歡我  
大父鷹揚郎將諱士幹嚴考獲嘉令諱果濟美惟舊冥德  
於君君幼而瓌奇長有規操樂道稽古昇堂覩奧伯父匡  
武撫之曰亢宗保家吾有望爾悉以先人家牒圖傳付之

入太學舉明經補巴西尉內憂去職君四歲而孤重集於  
蓼因心孺慕名教同傷歸次葭萌江溢毀道攀轎號慟濤  
爲之却蜚人哀之葺棧而濟釋服調襄陽尉主進魚家絕  
鱸食州將魯王俾盤二白魚時其亡也遺之夫人以辭君  
還拜受使復王曰非惟是夫又亦賢婦吾嘗其一得其二  
善焉長史盧幼孫悅是獎也舉君清幹有聞授清城尉未  
往且有後命爲河西營田判官物土穡人藁穀洋羨皇揆  
其懋考績登焉程務挺之軍靈夏也咨君運籌乘遞入幕  
獲虜數百欲剽罄之君諫曰王者之師將德是以討叛惟

武攜遠在寬搏牛之室不可破虱未擒伏念何逞累囚乃止師歸策勲上柱國改溫縣尉永淳阻飢廣提中外絕甘分少約已周人旣喪好逮室無嬖御夫人張氏詹事丞師寂之女也敬事皇姑能佐君子娠有胎教宗如樂諧前誌之美多所闕載絳郡夫人王氏則天聖后姑之女子而夫人之母也嘗曰婦則女訓吾女有焉享年不永元髮殂落先時君之伯姊歸宗夫人推居廨寢事之而躬處下室及亡設几筵於正寢惟明靈以女公之故憑巫通夢屢寢爲辭舉家懇啟久而後定噫生則盡禮死而知讓殆其神不



昧乎溫秩滿轉洛陽尉當周之興也版都社澤郊廟粹紛  
嶽僕明堂京穀回回日不暇給又勅君專總徒匠凡三百  
有餘旬蘊勞成疾聃憂損壽永昌元年孟夏辛卯卒官春  
秋五十有七帝用悼之贈朝散大夫旌淑紀庸禮也龜玉  
在山泉爲國寶以其靈與瑞君子居下位而上達以其名  
與義夫是之寵有由也哉葭萌之戚昭其孝也陽侯息浪  
異類胥感襄陽之饋識其潔也德形於家聲聞於外塞垣  
之讜植其仁也衆俘賴全將不爲暴重屋之役底其勤也  
沒而益榮朝不棄力有一於此猶爲令德況備舉乎豈惟

其身將施其後厥子構據擇皆國之良也爲有後之闕其  
在是乎徵構職太子僕景龍初宰長安也永惟考襲朱芾  
已佩葱珩母氏早逝而榮不及乃讓賜階乞封先妣天子  
憐之制贈夫人清河縣太君人謂長安能報恩矣詩云欲  
報之德昊天罔極此之謂也馬氏之墓世在扶風清河之  
喪也卜宅於洛陽北邙南麓後君捐館因窆其所夫人穴  
於兆之甲大夫窆於域之庚今龍集戊申將返葬故國君  
執友禮部侍郎嚴善思諗之曰夫子之逝一終八辰精氣  
其存親壤石矣吾嘗相二土從新其愈乎且不戀本達不

合葬古神尚休無或變有夢先君者與其言叶於是祇率  
嘉話旣妥成規堙雙墳溝四塹傍建祠宇前勒豐碑茫茫  
天地永懷長畢誰居後之人匪惟是四時烝薦之事所以  
觀百代祖宗之烈其詞曰

昂昂大夫有逸其致洽聞膚敏凋窮錫類行實迴川清能  
改位佐邑惟五安人則四多稼穰邊昌言扈帥比義后稷  
勤官沒地歔歔天朝毳衣以襪我有令德追啟清河宜家  
族揉主祭神和親戚光貴劍蓋金歌相從先後樂此山河

欽定全唐文卷二百二十八目錄

張說八

唐贈丹州刺史先府君碑

元識閣黎廬墓碑

唐故夏州都督太原王公神道碑

贈太尉裴公神道碑

大唐中散大夫行淄州司馬鄭府君神道碑

河州刺史冉府君神道碑

欽定全唐文卷二百二十八

張說八

唐贈丹州刺史先府君碑

府君諱隲字成隲范陽方城人也張祖曰揮帝軒之允肇  
勲弦木錫姓上矣詩有卿士孝友史有留侯世家八葉至  
東漢司空皓公子宇北平太守始居范陽四葉至西晉司  
空華公子躔散騎常侍乃僑江左昆孫太常復歸河洛故  
河東有司空砦洛陽有散騎里後司空至府君十二代不  
失仁義矣王父諱弋周通道館學士考諱恪無祿早世府

君榮生遺育四代單緒家世尚儒不及伯魚之訓外祖爲  
理遂讀臯陶之書以明法厯饒陽長子二尉介休主簿洪  
洞丞以所願乎下事乎上以所願乎上交乎下反身與人  
何往不順臺選貞白覆囚山南人謂是行有典刑矣昊天  
不弔年五十二調露元年十二月乙卯捐背於縣廨夫人  
長樂縣太君馮氏父威藍田丞敬修法度踐涉圖史顧復  
幼孤將就成立家道不殞夫人是賴享年七十有二傾背  
於東都康俗里第光珪說不天夙遭閔凶又集茶蓼先王  
制禮不敢從滅以景龍二年七月己酉安厝於萬安山陽

祔從周制也惟先君不祿俸不奉親不機杼不資身僚舊  
無鷄黍之接況非其類乎族姻無魚菽之受況其人吏乎  
是全其高而善其獨也過四十始閱六籍觀詩得之厚觀  
書得之恒觀樂得之和觀禮得之別觀春秋得之正觀易  
得之元曰君子多乎哉事斯一言而已矣每誦道記三復  
三寶曰至人之心有以垂世又聞之太夫人云吾有子五  
十載非其疾無一日之憂先夫人亦云吾事夫子三十年  
耳無忤聲目無暴色先君子之違世也其憂戀者尊門在  
殯歟聖善在堂歟我諸孤無日敢忘及王母終養二祖封

崇亦尚克家成遺訓矣若夫安親孝也宜家義也翼子慈也軌迹隱乎含光故當代罕耀馨香發乎潛德故明神終勞先大夫久而益榮沒而不朽蓋此景雲二年天子嘉侍臣之匪躬念前人之蘊德二月乙巳詔曰故官某毓德高邁藏器下僚代載儒雅家傳清白河東佐邑長不欺之風山南覆囚溢無冤之聽徂謝永久邱墳不飾啟茲令允貞事先朝宜崇追遠之恩以表揚名之志可贈使持節丹州刺史王澤漏乎泉壤國禮崇乎宗廟漢帝論士恨不見李牧之爲人曾子思親泣無逮楚王之厚祿道存運往痛矣



餘悲緬尋前哲之所以聞無聲於四海視不見於百代者  
匪銘頌歟桓麟蔡邕其則不遠嗚呼霜露交積松檟滋深  
兄弟永懷相顧將老胡伯虎豈敢掩大人之清陳季方何  
足知家君之德小子銜恤非曰能文莫假辭於他者務傳  
信於我也銘曰

猗嚴考用元妙體太和竭高志貞夫一戒其多孝於親正  
於家形于訓清厥心晦厥迹畏厥聞寶如何其謙儉孝慈  
皇哉褒德永世有詞

元識閣黎廬墓碑

夫孝者法象乎天地感通乎鬼神故愛敬之中又有眞報  
哀戚之外更追冥福元識禪師其人也厥姓桑氏其先長  
樂人漢尚書洪之後也曾祖梁州刺史諱千秋祖貴鄉縣  
令諱信考文林郎諱爽自前代無違德基於累仁是生達  
者禪師智周萬物而理證本無願度四生而見滅諸有以  
爲空不離色體念子之慈業不忘緣起思親之孝乃於萬  
山北陌滎陽東原葬先考文林府君先妣太原王氏負土  
成墳結廬其域置義井取施無求報鑄洪鐘取聞而悟道  
修古寺造尊容取觀相生信若夫信生攝攝生靜靜生定

定生慧於生滅處得常住心於虛空中立一切法其定慧之門乎禪師昔宴坐介山羣虎自擾今經行宰樹四衆依德至人凝寂雖罕見全象識者餘論亦時存一隅篆美豐石寄詞短偈云爾

邈矣上德行密道高哀哀父母生我勛勞禪心護念神足遊遨若河雖廣曾不容舳舻甘井旣渌利物無竭不增不減不流不滯仁靜而鑒智動而悅華鍾旣鏗雄雄法聲如來如去如滅如生不有奚得不爲胡成寶地嚴飾金山晃耀善惡無門惟人所召境因心起理憑思照懋哉一心混成

衆妙

唐故夏州都督太原王公神道碑

良玉禮神用之西序之器捨之南山之璞同然不有其珍也君子安命進之干城之雄退之去國之老隕然不失其正也語夫杖運以行道屬辭以比德亦何代無其人哉公諱方翼字仲翔太原祁人王周之後也王子以敗狄受姓徵君以遯世爲名司徒之濟艱難義形漢室太尉之圖舉甲心盡魏朝聞蔣濟所言則知尚書志力兄弟繼美覽周書所載則見潁川忠烈子姓皆封臣節奮揚於百代家聲

籍甚於四海大王父司徒定公乘隋氏之崇也王父駙馬  
開府文公裕先朝之懿也考特進慎公仁表皇室之甥也  
公門總四岳之靈帝子分五潢之氣是生時傑鬱爲人紀  
公雄姿沈毅凜難犯之色虛懷信厚坦招納之量識畧精  
斷達應變之權神守密靜堅不奪之節孝友內兆於免懷  
忠敬外灼於旣冠加以思參造化誠合鬼神文其詩書武  
其韜畧推此才也以從政焉求無匱矣夙遭家艱哀過柴  
瘁京師號曰孝童王母同安長公主引貴游之誠示作苦  
之端命太夫人徙居鄮墅儲無斗粟庇無尺椽公躬率傭

保肆勤給養墾山出田燎松鬻墨一年而良疇千畝二年而厦屋百間三年則日舉壽觴厭珍膳矣處約能久不亦仁乎在困能亨不亦智乎永徽初始宰安定誅豪暴以育人察奸宄以申冤異政三舉清風一變除瀚海都護府司馬以母疾辭職爲姜恪乘便逐徙朔州尚德府果毅歲餘王本立上書理公國之惇孝不宜擯抑有詔徵還而親不待心與哀絕氣屬禮存詔御醫孟默朝夕診視免喪逾年僅堪履立樂成公東討新羅薦爲將帥詔公持節雞林道總管軍停不行授沙州刺史未至改拜肅州以爲慢防啟

寇非重閉也乃大築雉堞嚴備櫓械人知有恃戎亦來威  
儀鳳歲河西盡蝗獨不入境鄰郡湊稔提挈如雲公傾私  
泉以資乏引激水以立磴舉火百竈日饋千人遂有芝草  
叢生豐年屢降人之詠德刊石存焉裴吏部立名波斯實  
取遮匄偉公威厲飛書薦請詔公爲波斯軍副使兼安西  
都護上柱國以安西都護杜懷寶爲庭州刺史大城碎葉  
街郭迴互夷夏縱觀莫究端倪三十六蕃承風謁賀自泊  
汗海東肅如也無何詔公爲庭州刺史以波斯使領金山  
都護前使杜懷寶更統安西鎮守碎葉朝廷始以鎮不寧

蕃故授公代寶又以求不失鎮復命寶代公夫然有以見  
諸蕃之心搖矣於是車薄啜首唱寇兵羣蕃響應蝟毛而  
豎公在磧西獻捷無虛歲蹙車薄於弓月陷咽麪於熱海  
剿叛徒三千於麾下走烏鶻十萬於域外皆以少覆衆以  
誠動天葛水暴漲祭徹而三軍涉渡葉河無舟兵叩而七  
月冰合由是士卒益勇戎狄益懼璽書下問皇靈遠爍遷  
夏州都督徵詣奉天宮熱海之役流矢貫臂陣血染袖事  
等殷輪帝顧而問之視瘡歎歔曰爲國致身乃吾親也妖  
賊白鐵余據平城以反奉詔與程務挺討擒之善公有發



石壞城之計反風焚柵之感封太原郡公元珍寇邊受命  
討擊公以無甲乃發思造六片木排袴關鈕解合畫爲虎  
文北至關先與虜合戰若驅猛獸蒙臯比莫之敵也胡馬  
奔駭獲其二啜桑乾舍利兩部來降初公善書與魏叔琬  
相輩工射與趙持滿齊名帝每矚之賜比鳴輦賞深懸帳  
嘗獨行入夜有怪人長丈直來趣逼射而仆焉乃朽木也  
太宗壯之授右千牛及持滿伏法暴骸公哀而收葬爲金  
吾奏劾高宗義之釋而不罪履道坦坦多如此類適將任  
帝夔龍爲國方虎天下膏潤羣生雲雨惜哉不辰悄焉邁

侮嗣聖之際太后臨朝有凶人誣奏公廢后從兄常懷快  
快司刑御史侮文矯制不名等法遷於崖州路至衡山寢  
疾捐館春秋六十有三垂拱三年閏正月二十九日葬於  
咸陽原君子曰斯才也斯望也難乎免於斯之代也周公  
聖而謗屈平賢而放賈誼才而謫李廣勞而喪彼天命之  
糾紛此人情之惆悵神龍中興以陷酷吏例復官爵孝爲  
人極忠爲令德神之聽之始枉終直信矣有子故光祿少  
卿璵今祕書監珣皆篤行純孝慎終追遠說少也蒙會友  
昇堂今老矣豈能文旌墓遷司漢籍感激論都尉之書邕

敘彪情追美樹楊公之碣銘曰

上德惟公氣秀才傑孝宏世美忠廣前列日月心照江河  
思決難地必通暗機先徹卓犖文藝崢嶸武節歎由宰邑  
借恂臨郡海女避途山蛇可問師律三總軍聲六振銳氣  
入營長雲出陣肅將國威烜赫天外玉弩方擎雲旗卷旆  
天道茫茫自古多傷功存西域身棄南荒易簣中路懸棺  
反藏寶刀生衣玉玦無光後有才子先賢不忘

贈太尉裴公神道碑

星辰懸象所以殷時布氣然而行不言之道者天也文武

用才所以勤官定國然而致無爲之理者帝也當高宗之  
休運任名世之良臣清九流而闢四海代天工而張帝德  
歷選前哲豈多乎哉公諱行儉字守約河東聞喜人也其  
先出乎嬴姓伯翳之後也秦則裴侯始封漢則侍中受職  
魏晉之代鬱爲盛門八裴方於八王聲振海內三子尊爲  
三祖望高士族自冀州刺史徽至公十二代中軍將軍雙  
虎至公六葉代無違德不隕厥問者已大王父伯鳳周驃  
騎大將軍光汾二州刺史琅邪郡開國公大父定高大將  
軍馮翊郡守襲瑯邪郡公諸侯受封山河傳國天子共理

循良克家考仁基隋左光祿大夫以陰圖王充仗義舊主  
遭時不利玉折名揚聖唐龍興旌淑勵節贈原州都督命  
諡曰忠蓋春秋之褒也公清明本乎世德正性出乎胎教  
氣潤河靈貌雄岳立仁孝之道天生而知將相之器與年  
俱長以高蔭爲宏文生絕事篤學累年不舉房僕射異而  
問焉對曰隋室喪亂家乏典籍館有良書探討未遍故少  
留耳梁公驚曰驥子志氣凌雲當一日千里其早爲通人  
之目也如是明經補左屯衛倉曹詔舉轉雍州司士遷金  
部戶部二員外歷都官郎中長安令明慶中與長孫太尉

褚河南論及中宮廢立國家憂患有公伯僚譖行於季氏  
出爲西州長史又改金山副都護又拜安西大都護西域  
從政七八年閒窮荒舉落重譯向化我之獨賢邊之多幸  
乾封歲徵爲同文少卿尋除司列少常伯官復舊號爲吏  
部侍郎加銀青光祿大夫自居銓管大設綱綜辨職差才  
審官序爵法著新格言成故事上元中長星出天禿髮入  
塞詔公爲洮州道左軍總管又爲秦州鎮撫右軍總管並  
受元帥周王節度雖祭公有諫耀武之事不行而方叔帥  
師來威之道備矣儀鳳二年十姓可汗剽延都支及李遮

畲潛構犬戎倣擾西域朝廷憑怒將行天討公進議曰敬  
元敗績於茅戎審禮免胄而入狄豈可絕域更勦王師今  
波斯王亡侍子在此若命使冊立即路由二蕃便宜取之  
是成禽也高宗善其計詔公以名冊送波斯兼安撫大使  
公往莅遺愛洽於人心是行也百城故老望塵而雅拜四  
鎮酋渠連營而諮酒一言召募萬騎雲集公乃解嚴以反  
謀託獵以訓旅誤之多方閒其無備裹糧十日執都支於  
帳前破竹一呼鉗遮畲於麾下羣戎相慶立碑碎葉蓋美  
克雋不殺而用謀安人以德而去害廓氛禳於地表燁皇

靈於天外充國有屯田之頌實憲有燕山之銘詢茲遠畧  
彼何微也遷禮部尚書加上柱國又特降恩命兼右衛大  
將軍夷典秩宗神必據我文昌有將天道存焉調露中單  
于可汗伏念外叛大鴻臚蕭嗣業喪律詔公爲定襄道大  
總管軍至朔州斥候相接匈奴故態狃劫糧以餒師神將  
出奇張虛勢以啗敵僞爲轉運伏其壯士示羸師以緩行  
隱精騎以躡跡寇果大下援兵奔散驕虜益驚自爲得色  
驅此車牛憩彼泉井於是箱中兵起千弩齊發要路騎飛  
一息而至羣胡顛沛殺傷滿野從茲饋運路無驚者觀夫



大漠無倪穹廬靡所追之逃遁捨之憑陵費日老師兵家  
所病公潛使緩頰均其利心深圖旣入狼意亦改及委罪  
衙官陰送降狀公密上其事人莫知之及如其期舉國歸  
附煙塵大起師徒惶惑公徐使令軍曰此是伏念執溫傳  
來降非他寇也俄而衙壁轅門釋縛納款帝嘉其勲命尚  
書崔知悌乘驛勞軍備禮獻凱策勲之日程務挺張虔勗  
者行軍之偏將也訴言子營逼逐方降大軍又屬秉鈞忌  
才下上其手公曰雖不逮羣帥之讓功猶恥與二王之競  
力今而殺降後無來者乃封公聞喜縣開國公而伏念溫

傳皆戮都市是年也伏念弟元珍擁其餘種復叛則天稱制追正宿枉贈伏念太僕卿程張諸家別故夷族君子以爲神理之不可誣也永淳元年詔公爲金牙道大總管未行遘疾四月二十八日薨於京師延壽里春秋六十有四長子貞隱早卒嫡孫參元嗣封藐是諸孤哀哀童幼高宗悼焉贈幽州都督賜凶儀還鄉喪葬官供禮部郎中監護窆窆之數率禮有加別勅留守委皇太子擇六品京官一人檢校家事五六年閒待兒孫稍成長日停寵極哀榮禮之厚者澤及存沒義莫重焉太常議諡博古多能文武表

式曰憲其年十月葬我憲公於聞喜之東良原禮也神龍  
中興朝思舊德贈公揚州大都督開元孝享宰嗣延恩贈  
公太尉生不登乎台階沒追位乎靈宰序四時於下地調  
三光於上天聖人神教意在茲乎公志堅慮精神勇識澈  
藝必討本學皆覩奧又善測候雲物推步氣象鬼無遁謀  
靈不藏用著文集二十卷造草字數千文皆寶傳人閒以  
爲代法又撰選譜十卷又爲軍營行陣部衆料敵等四十  
六訣大聖天后令祕書監武承嗣就家取進以爲祕術豈  
比馬卿浮華唯留封禪之草劉安虛誕空傳鴻寶之書而

已哉加以汲引沈淪推獎氣類虛懷而襟帶不設宏亮而  
城府洞開故虎旅雲從詞林響應若毛羽之宗麟鳳衆川  
之長江河也在選曹見駱賓王盧照鄰王勃楊炯評曰炯  
雖有才名不過令長其餘華而不實鮮克令終見蘇味道  
王劇歎曰十數年外當居衡石後各如其言其在軍麾擇  
帳下之士則有張知運薛訥閻敬容甘元暕裴思諒王智  
方呂休璟劉元意引偏裨之將則有程務挺張虔勗王方  
翼崔智詥党金毗郭待封劉敬同李多祚黑齒常之凡所  
進拔盡爲名將此則有道之人倫武侯之賞鑒也公之送

波斯也入莫賀延磧中遇風沙大起天地暝晦引導皆迷  
因命息徒至誠虔禱徇於衆曰井泉不遠須臾風止氛開  
有香泉豐草宛在營側後來之人莫知其處此乃耿恭之  
拜井商人之化城也公在禮闈勅賜善馬及寶鞍令史奔  
馳馬倒鞍破懼而逃罪公使召之曰知汝誤耳又平都支  
遮匐大獲珍異酋長將吏請遍觀焉有馬瑙大盤希代之  
寶也隨軍王休烈捧盤跌倒應時而碎叩頭流血惶怖請  
死公笑曰事有不意何至重玉而害人乎此又文饒之含  
容耶吉之仁恕也公西擒都支北降伏念前後錫馬五百

匹僮二百人金銀器物三千品錦罽織皮三百段公受置  
庭中旬日盡散此又趙奢之待士田文之市義也若夫知  
人以爲本感通以爲行善貸以爲常散積以爲樂古之有  
道者嘗從事于斯矣公元夫人河南陸氏兵部侍郎爽之  
女也陸氏卒繼室以華陽夫人庾狄氏有任姒之德班左  
之才聖后臨朝召入宮闕拜爲御正中宗踐祚歸養私門  
歲時致禮媯皇一作后補天進參十亂少康嗣夏退協三從  
晉朝公卿列拜虞潭之母周官音注近同韋逞之家皇上  
臨極旁求陰政再降綸言將留內輔夫人深戒榮滿遠悟

眞筌固辭羸僊超謝塵俗每讀信行禪師集錄永期尊奉  
開元五年四月二日歸眞京邑其年八月遷窆於終南山  
鵝鳴堆信行禪師靈塔之後古不合葬魂無不之成遺志  
也長孫參元官至涇鄧二州刺史聿修厥德人忘道存次  
子延休并州文水令世載文雄家傳草聖次子慶遠協律  
郎深達禮樂克和神人咸負長才同淪短運季子光庭侍  
中兼吏部尚書輔政邕熙致君堯舜孝理發乎陵廟仁澤  
遍乎松檟是故妻以夫榮母以子貴以尚書先贈方伯申  
命止公夫人舊封華陽增號晉國詩云文武吉甫萬邦之

憲上公有焉又曰彼美孟姜德音不忘小君有焉孝經云

立身行道以彰

顯一作

父母侍中有焉合三德而爲家橫百

代而濟美信可以言時稱伐鏤石刊金者歟神道前銘薛  
令所撰且有後命俾余係述馬遷世家益孟堅之一傳劉  
寬表墓並伯喈之兩碑報德教忠俱傳不朽銘曰

天生亞聖祚此王國文綜九流武參七德柔遠服叛窮西  
盡北赫我皇靈去其蝥賊仁則不遠智何不周如山之峻  
如川之流術與神合藝將道遊書來懸帳賦出登樓司馬  
軍陣官人綱紀帝加常伯國于聞喜室有令妻家成克子



社金傳世桓圭守祀神爲上台永介邦祉

大唐中散大夫行淄州司馬鄭府君神道碑

五岳可陟惟德也謂之崇高萬物皆化惟名也謂之不朽  
若夫行欲蓋而德彰道無求而名立常聞其語今見其人  
公諱某滎陽人也華州刺史襄城公偉之曾孫蒲陽太守  
大濟之孫荊州刺史乾獎之子在昔周王敦序九族封懿  
親於鄭維時鄭伯敬敷五教賦善職於周其後蕃衍儒門  
光華士族威行西域名震京師入則天子授經出則單于  
抗禮公揭日月表山川體二氣之清淳納百代之層慶越

在岐嶷異於常童旣以冠帶遊皆長者初以門子宿衛解  
褐涼州參軍轉嘉州司士又宰鍾離當陽二縣皆秩滿兼  
攝江陵朞月政不改俗官不易方羣盜出奔遠人來附其  
所處也入境聞愷悌之聲其所去也扶路有鬱陶之思非  
夫忠信以結之法令以齊之易簡以業之仁義以肥之孰  
能順人如此其理者乎神皇玉冊受天金壇拜洛頓網而  
鶴書下闢門而羣龍至公待詔公車召議宣室目以奇士  
承一顧之恩許其正人參四率之屬乃墨制除太子右清  
道長史尋加中散大夫行淄州司馬負士元之才於是拜

職遇邱明之疾從茲掛冠洛汭閑居漳濱沈痼優游卒歲  
福應愆期豈非朋友之哭將見神仙之弔享年七十有九  
神龍二年夏六月十五日終於洛陽之私第冬十月一日  
歸葬於滎陽之舊原成先志也公執親之喪三年泣血以  
聞州里不亦孝乎先人餘業一物不有以讓兄弟不亦悌  
乎加以振窮紆急隱德陰施惠人由己反身待物是用氣  
類益親聲談載路善擊劍好投壺盡五射之妙巧究六書  
之體勢此蓋行有餘力則以多能位不充量天之命也有  
子曰博古曰博雅曰嘉徵曰嘉慶曰嘉重生極其養沒過

平戚恭惟皇考安宅靈邱盛德備於卑位家風缺於國史  
伐石他山寄哀詞客子產遺愛得無叔譽之言公業不亡  
實有荀攸之歎式撰鴻烈垂之後昆銘曰

大君有命桓公封鄭世執王政其後不競爲韓所并以國  
成姓沈水截河溢爲滎波荆山之阿勝氣實多高門戔戔  
袞服委佗猗嗟君子世濟其美動如義市居成仁里鳳集  
文史懷啼弧矢美政當官惟人所安救危拯越勞而不伐  
大運奄忽芳留形沒高隴旣封深泉又重徑無人蹤蒼苔  
歲濃哀哀邱隴墮淚青松

河州刺史冉府君神道碑

昔者堯舜旣沒文武將墜天縱孔聖誕敷皇極於是乎恢  
六藝而正王道舉十哲而闡微言雍也爲德行之目求也  
爲政事之首吾見乎龍翰鳳雛百代而共貫虎符犀節重  
世而增華明德之後知其必大公諱實字茂實其先魯國  
鄒人也古天子有相氏宅於相土實曰冉姓蓋氏族之興  
舊矣不常厥所今爲河南人焉五代祖睢陽公諱道周尚  
齊南康公主位平南將軍散騎常侍荊州刺史信州都督  
高祖諱軫仕梁太子左內率荊州刺史齊梁之間荆巫重

鎮世善其職江漢宜之曾大父義城公諱黎在梁雲麾將軍湖州刺史入周拜驃騎開府儀同至隋開皇中爲旭州刺史大父黃國莊公諱安昌隋啟平城祚之穀璧唐分蜀國瑞以桓珪其後改封於黃授信州刺史歷潭州總管贈夔州都督烈考天水郡果公諱仁才秩金紫光祿大夫婚皇室漢南縣主涇浦澧袁江永凡六州刺史偉矣哉承家善慶歷代名臣風流載於史官勲業藏於王府公即果公季子天王自出內稟胎教混成之姿外被門風式瞻之訓從容合度造次皆法生而知之孝弟也學而知之禮樂也

德義如山文章如泉縉紳之士仰焉宗焉弱冠太學生進士擢第遭家不造府君捐館五日絕漿三年泣血雖麻葛就禮而藥棘加人服闋調并州大都督府參軍事丁太夫人憂過哀終喪有如前制應八科舉策問高第授絳州司戶參軍轉揚州大都督府倉曹參軍又舉四科敷言簡帝除益州導江縣令鴻漸二鎮翰飛三蜀府中之孫子荆郢內之岑公孝用能據淮距海我庾如坻岷山導江入境先歎加朝散大夫除鄜州長史仍加關內道支度使去青城之洞府來白帝之鄜祠命服有輝使車何重除婺州司馬

入謝於武成殿主上以邊庭有事喜問陳湯宣室清言思  
逢賈誼公召對蘊藉謀慮深長眷甚前席恩加後命因改  
恒州長史於時四鎮未復二蕃猶梗屯田遶塞戎馬生郊  
代郡藏符臨冀北而誠重漢家張掖比西河而還輕乃徙  
拜涼州都督府長史仍知赤水軍兵馬河西諸軍支度使  
地壯伏龍城雄飛鳥位居半刺總管三邊公乃利溝洫懋  
薦藁庠芟藁積糗糧均轉輸程力役寬御悅使授方任能  
人胥忘其久勞兵不遠其長道雖金方氣候風雨不交之  
地磧路沙霾草木不植之所莫不豐滯穗於垆牧厭甘瓜



於成時朝廷賴之遷使持節河州諸軍事河州刺史仍知  
營田使崆峒連五郡之壤積石控九河之源公夙奉皇華  
政聞行露高車未至闔境相歡旣見君子溫其如玉率性  
仁愛由衷易簡推是心也物感斯應覩恭肅而無競見禮  
義而興行不言而庶事熙非教而羣下順故得大田多稼  
人和歲豐饗軍廩師處勤餘裕計偕入朝侍宴於長壽殿  
上謂公曰河州軍鎮要衝屯田最多卿以足食爲心朕無  
西顧之憂矣侑以彩幣錫以文袞及公還州也璽書勞勉  
王人相繼國家徑流沙梁弱水收西域護南庭連百萬之

兵以濟事於外不一日而乏者則公之力也無駭入極可  
謂費忼父勝之杜預平吳蓋知羊叔子功爾宜登元老作  
貳天朝止於邊服寔孤人望享年七十有一謚聖元年二  
月十日寢疾終於官舍天子悼焉凶費喪歸悉命官給是  
日河湟耆老山谷羌夷反首勢面號奔州邑雖國亡子產  
吏哭祭遵豈云過也愷悌之化人之父母及其沒也哀亦  
如之信矣夫夫人金城郡君隴西李氏江夏王道宗之女  
也宜此象服爛其盈門嗣先姑之徽音立庶姬之範則薤  
華前落藁塵城隅以證聖二年正月合葬於河南之定鼎

原禮也天使馬悲啟滕公之室人看鶴舞開王女之墳松  
柏接於邙山邱陵對於伊闕石麟將鬪華表何年有子曰  
祖雍景龍初擢給事中兼侍御史內供奉追惟皇考孝於  
事親忠於事君恭於立身惠於臨人總是四行旁通具美  
貽厥孫謀以燕翼子故老之口旣絕竹帛之文又滅揚名  
兮柰何刊石兮來裔其詞曰

倬哉冉氏世有仲弓鐵冠繡服給事於中克昭遺懿樹之  
家風於皇嚴考高明有融德罔不尊藝何不涉嗣武先正  
思文載協建旗千里逮君六葉龜顧印房蛇盤綬篋官以

勤積業因時峻宰號神明掾稱親信驥足旣展熊軒亦軻  
邦國海康京師河潤出車西域我君謨之屯田北假我君  
護之六軍有饋其誰度之一人無憂其誰樂之猛獸避德  
均遷所莅靈鳥依仁霸昇執事以今視古名齊績類天不  
憖遺山頽此位隴首回望秦川斷腸吏人攀紼哀鴈隨喪  
虛靈奠野行臨帷堂廟立邊郡魂歸故鄉王姬祔葬禮之  
終也水合蛟龍墳同石馬地積霜露煙攢松檟千載九原  
高碑淚下